

TUSI TA'IALA MO LE PULEA LELEI O TOGATOGO MA LE GATAIFALE

O LE AFIOAGA O



SAUNIA:

Pule mamalu a Alii ma Faipule ma tagatanu'u o le afio'aga o VAIUSU faatasi ai ma le lagolagosua a le Vaega o Faigafaiva a le Matagaluega o Faatoaga ma Faigafaiva (MAF).

FAASOLOGA

1. Faamatalaga e uiga i le Afioga
 - 1.1 *Faatomuaga*
 - 1.2 *Sui o le Komiti mo le Pulea Tatau ma le toe Tapueina o Tamaoaiga o Gataifale o Vaiusu Faleata*
 - 1.3 *Faafanua o Vaiusu Faleata*
2. Tulafono i Aso ua Mavae ma Aso nei
 - 2.1 *Aotelega o tulafono o le siosiomaga o le gataifale ma faigafaiva i aso ua mavae ma nei ona po*
3. O Ienei Tusi Taiala
 - 3.1 *Autu*
 - 3.2 *Tapenaga o Ienei Tusi Taiala*
4. Ituaiga Faigafaiva Taatele
5. Toe iloiloina o Ienei Fuafuaga Tatau

1 Faamatalaga e uiga i le Afioga

1.1 Faatomuaga

O Togatogo sa faatusaina i aso ua mavae e pei o ni nofoaga faataufusi palapala ma mataga e lafoai iai le tele o otaota ma lapisi a aiga aemaise o afioga. Talu ai ona o foliga vaaia o nei nofoaga e toatele nisi ua taina i lalo ma tanuina nei nofoaga aua nisi o atinae faa-le-aiga, pe faa-le-nuu.

Peitai i nei vaitaimi ua tele ona aoaoina ma silafia foi e le toatele o le mamalu o le atunuu le taua ma le aoga tele o Togatogo i le siosiomaga aemaise i meaola ninii o loo feola ma tautuufua ai i nei nofoaga.

O togatogo e pei lava o isi laau o le siosiomaga. E latou te faaogaina le vevela o le La e kukaina ai a latou meaai. O nei meaai e maua mai i le La faatasi ai ma minerale maua mai i a'a o le togo mai vai-faataufusi ma vai-tafe e teuina i o latou lau-laau.

O lau-laau o Togatogo e tutupu ma toulu-faa-otaota pea lava pea i le tausaga atoa ma tausaga uma pe'a faapea e le taina i lalo pe faatamaiaina foi e nisi.

- O le tasi lea o taua o Togatogo ona o otaota e mafua mai i ona lau-laau toulu e aveva lea ma meaai e tausia ma feola ai le tele o meaola ninii o le gataifale.
- O leisi aoga taua o Togatogo ona o nei nofoaga e sulufai iai meaola ninii mai i o latou fili.
- O leisi aoga taua o le aveva lea o nofoaga o Togatogo ma nofoaga e tautuufua ma fanafanau ai nisi o i'a ma figota o le gataifale.
- O le isi foi aoga o Togatogo o le aveva lea o nei laau ma puipuiga muamua o alalafaga tu-matafaga i ni faalavelave faa-le-natura e pei o Galu Lolo, Galu malolosi, Afa, Matagi Malolosi ma isi.

E ui lava la i le aoga ma le taua tele o Togatogo ua tatou iloa nei, ae peitai o loo iai lava nisi o loo manatu pea o nei nofoaga e tataua ona taina i lalo ma tanumia aua atinae eseese e mafai ona faatinoina i nei nofoaga. O nisi o atinae e aofia ai le fausiaina o maota o aiga, fausiaina o atinae faa-pisinisi ia ma isi lava o atinae.

O lenei la polokalame o le toe totoina ma le faasaoina o Togatogo i se vaega o le gataifale o Vaiusu, o se galuega ua sili lea lona taua. Ua faailoa mai i lenei polokalame le faa-tauaina o Togatogo e Alii ma Faipule aemaise ai foi Komiti o Faletua ma Tausi o lenei nuu.

O le faamoemoe o lenei galuega o le toe totoina lea o le togatogo i gataifale o Vaiusu aua le toe atinaeina lea o le lelei o le siosiomaga aemaise mo le toe faatamaoigaina o i'a ma figota.

O lenei fuafuaga o mo le Pulea Lelei o Togatogo ma le Gataifale o Vaiusu Faleata ua saunia e Alii ma Faipule faatasi ai ma le Faufautua a le Komiti o Faletua ma Tausi. O loo faatasi ai foi ma le lagolagosua a le Vaega o Faigafaiva o le Matagaluega o Fa'atoga ma Faigafaiva (MAF).



O se va'aiga matagofie leni i nisi o le afioaga o Vaiusu na auai i le tapenaga o leni Tusi Taiala.

1.2 Sui o le Komiti mo le Pulea Tatau ma le toe Tapueina o Tamaoaiqa o Gataifale o Vaiusu Faleata

O leni faamaumauga o suafa o le Komiti na filifilia i le fonotaga na faia i le Aso Tofi 13 Aperila 2006.

Komiti Matai

- | | |
|------------------------------------|--------------------|
| 1) Feaunati Ulugia (Pulenuu) | 7) Asi Malu |
| 2) Ulugia Poe (Taitai Fono) | 8) Laupui Falaniko |
| 3) Ulugia Petelo (Sui Taitai Fono) | 9) Vaise Ropati |
| 4) Mailo Sio (Failautusi) | 10) Oloese Sefo |
| 5) Seiuli Vatau | 11) Nuui Simi |
| 6) Laauli Ainuu | 12) Maufuaina Iele |


Komiti Tina

- | | |
|-------------------------------|----------------------------|
| 13) Ake Laulu (Sui o le Malo) | 17) Sita Teumalu Teufilelo |
| 14) Tusi Seiuli | 18) Otilia Mailo Sio |
| 15) Matafu Feaunati Ulugia | 19) Tina Ainuu |
| 16) Faamu Leiatua | 20) Eseta Ulugia Petelo |

Komiti Taulelea

- | | |
|--------------------|-----------------------|
| 21) Laauli Vaiusu | 23) Iosefo Aukusitino |
| 22) Iosefo Lafaele | 24) Uati Ulugia |

1.3 Faafanua o Vaiusu Faleata





O se vaaiga lenei i le alalafaga o Vaiusu ma le vaega o le gataifale ua faamoemoe mo le toe totoina ai o le Togatogo. O lenei faamoemoe e mo le toe tapueina mai o le tamaoaiga o le gataifale aemaise o le toe atinaeina o lona siosiomaga

2 Tulafono i Aso ua Mavae ma Aso nei

2.1 Aotelega o tulafono o le siosiomaga o le gataifale ma faigafaiva i aso ua mavae ma nei ona po

Tulafono a le afioaga o Vaiusu.

O le faasaina o faigafaiva le talafeagai:

- Fanaia
- Ava niukini
- Vailaau oona

O nei tulafono o loo faamamaluina ma amanaiaina i le pule mamalu a Alii ma Faipule o Vaiusu e oo mai i le taimi nei. O le tofa autasi i le paia i le afioaga e faatinoina le Polokalame o le Faasao o se fuafuaga talafeagai lea mo le toe faamalosia ma le faamauina pea o nei tulafono i totonu o le afioaga.

O nei fuafuaga uma o loo aafia i Fuafuaga Faataatitia (management activities) mo le Pulea Tatau o le Siosiomaga ma Tamaoaiga o Gataifale o Vaiusu.

E le gafatia na o le malosi faaletulafono a le Malo ona malu puipuia ai le siosiomaga o le gataifale ma ona tamaoaiga. E utiuti tulaga tau tupe ma toagaogao foi le afaigaluega a le Malo latou te faamalasia ma unaia tulafono tau faigafaiva i nuu taitasi o Samoa. O le fofo talafeagai o loo i aao o tagata o loo soifua ma alaala i le afio'aga faatasi ai ma le faamalumaluga a le Fono a Alii ma Faipule.

O lenei tali o le a le pine ona unaia tagata latou te galulue faatasi ina ia malupuipuia ma faaleleia le siosiomaga o le gataifale ma ona tamaoaiga mo nei, ma tupulaga o le lumanai.

3 ○ Ienei Tusi Taiala

3.1 *Autu*

O lenei Tusi Taiala ua tusinga ai ni faatinoga e manaomia ina ia maua ai sona taunuuga maumaututu. O le faamoemoe maualuga o le Malo ma le Vaega o Faigafaiva ina ia faaleleia le soifua manuia o tagata o le afioaga, ma ia faatupulaia atili mea taumafa mai le sami. O lea e manaomia ai tagata uma ina ia faatino le puipuia o le siosiomaga o le gataifale ma ia fuafua tatau ai le fagotaina o i' a ma figota. O nei fuafuaga na faaalua e le Komiti ma tagatanuu o le afioaga e avea ma autu.

“Ina ia puipuia le siosiomaga o le gataifale ma toe faatupulaia i' a ma figota mo tupulaga o le lumanai.

Ua ioeina e le fonotaga a le Komiti i le Aso Tofi 13 Aperila 2006, o le Komiti lava lenei latou te faamalasia ma unaia vaega eseese uma o le afioaga aua le puipuia ma le faasaoina o atinae ma alamanuia o le gataifale o Vaiusu. O lenei foi Komiti o loo gafa ma le tapenaga o tulafono aemaise o vaega uma e tatau mo le Tusi Taiala. O le tele foi o nei tapenaga o le a tuuina atu i le pule mamalu a Alii ma Faipule mo le pasiaina. O lenei Tusi Taiala ua faamoemoe ina ia faaogaina pea ae peitai afai ae i ai se suiga, e alaga tatau ona toe suesueina lenei Tusi Taiala.

3.2 *Tapenaga o lenei Tusi Taiala*

O lenei tapenaga sa saunia lava e tagata o le afioaga o Vaiusu, faatasi ai ma ni fautuaga ma le lagolagosua a le Vaega o Faigafaiva. O se ootoga lenei o le tapenaga mo le Tusi Taiala i le faamoemoe o le ;

- Pulea Tatau o le Siosiomaga ma Tamaoaiga o Gataifale o Vaiusu

Feiloaiga Muamua:

O le feiloaiga muamua sa faamautuina mai e le Afioga Seiuli Vatau i se aoaoga na faia mo le afioaga o Vaiusu. O le Aso Faraila 17 Mati 2006, sa tauaofia ai le uluai fonofono a sui o le Ofisa ma le afioaga mo le faamalalamaina ma le taliaina o lenei polokalame.

Vaevaeina o Vaega:

O vaega sa vaevaeina i ai e aofia ai Matai, Aumaga ma le Vaega a Tina ma Tamaitai. Sa feiloai nei vaega e tolu ma sui o le Ofisa o Faigafaiva ma faatalatalanoaina ai faafitauli o le gataifale o loo alia'e i le afio'aga atoa ai ma ni fofo talafeagai e faaono foia ai nei faafitauli.

Komiti mo le Pulea Tatau ma le Vaaia Lelei o Tamaoaiga o le Gataifale (KVL):

I lenei Komiti o loo aafia ai sui na filifilia mai i vaega taitasi, latou te molia finagalo fa'aalia o vaega eseese i le fonu a le Komiti. O lenei Komiti latou te tuu faatasia faamaumauga ma faamatalaga mai i nei vaega taitasi, ma sa mafai ai ona latou tapenaina se ata faataitai o le Pulea o le Siosiomaga o le Gataifale ma le Vaaia Lelei o i' a ma figota. O lenei fuafuaga o loo aafia ai lagona o tagata o le afioaga i le puleaina o Faigafaiva ma le siosiomaga o le gataifale.

4 Tulafono ma Fuafuaga Faata'atitia o le Tusi Taiala

O fuafuaga faataatitia o ni gaoiga ua faamoemoe e faaono foia ai faafitauli ua faaalia mai e vaega eseese o le Afioaga. E lua (2) ituaiga fuafuaga faataatitia ua fuafuaina ma o le fuafuaga ua aupito sili ona taua o:

- Fuafuaga faataatitia ua faagaga mo nuu poo afioaga.
- Fuafuaga faataatitia ua faamoemoe lea mo le Ofisa o Faigafaiva ma o lenei fuafuaga faataatitia a le Vaega o Faigafaiva o le tuuina atu lea o fautuaga poo fesoasoani mo le faamoemoe (FAASAO VAIUSU)

O gaoiga uma lava ua faamoemoe e faatinoina ai fuafuaga faataatitia mo le Vaega o Faigafaiva e ao ona faamaonia e le faatonu lagolago o le Vaega o Faigafaiva. O nei fuafuaga faataatitia uma ua faamoemoe o le a faataunuina i le lagolagosua mai o le afioaga.

4.1 Faamalosi Tulafono faale nuu e faasaina ai faigafaiva le talafeagai e pei o fanai'a, ava niu kini ma vailaau oona.

Otootoga

O nisi o auala tau faigafaiva ua mautinoa lo latou ogaoga i le faatamaiaina o nofoaga taua mo meaola e i ai amu aemaise o le tele meaola o le gataifale, ma o se faataitai o nei faigafaiva le talafeagai e pei o ava niu kini, fanaia, vailaau oona ma upega saina.

Ua le gata ina faatamaia ai se vaega tele o le gataifale ae o le a faapea foi ona umi se taimi e mafai ai ona toe fafoi le tamaoaiga o le gataifale i se lelei e i ai.

Fuafuaga faataatitia a le Afioaga.

Talu ai ona o le tulaga pagatia ua i ai le gataifale o lenei afioaga o Vaiusu o lea ua a'e ai se finagalo autasi i le Komiti ua filifilia ina ia matua faamalosi loa tulafono a le Afioaga e faasaina ai tulafono le talafeagai e pei o ava niu kini, fanaia, vailaau oona ma upega saina. O le puipuiga ma le faamamaluina o nei tulafono o le a i aao lava o le pule mamalu a alii ma faipule faatasi ai ma le lagolagosua a tagata nuu o le afioaga.

Fautuaga:

Ia toe faamalosi ma faamamaluina tulafono ua taua i lalo o la Afioaga mo le faasaina o Faigafaiva le talafeagai.

Tulafono:

Mo le mamalu o le atunuu faatasi ai ma tagata nuu o le afioaga o Vaiusu - Ua matua faasaina lava faigafaiva le talafeagai e pei o ava niu kini, fanaia, vailaau oona ma upega saina. O le puipuiga ma le faamamaluina o nei tulafono o le a i aao o le Pule mamalu a Alii ma Faipule faatasi ai ma le lagolagosua a tagata o le Afioaga.

Faasalaga:

O le tagata o le afioaga poo tagata mai isi afioaga e solia lenei tulafono, o le a faasalaina i le 5 pusa apa ma le \$500.00. A le usitaia o le a molia loa i le tulafono faatonotonu a le malo mo Faigafaiva.

Fuafuaga faataatitia a le Ofisa o Faigafaiva.

O le a fesoasoani le Vaega o faigafaiva i le faamalosia ma le faamalosia o lenei tulafono.

4.2 la faasaina upega ma tili matanini'i.

Otootoga

O le faaogaina o Upega ma Tili mataninii ua maitauina le tele o ia laiti ua faatamaia ai. Ua iai le talitonuga o le a o'o atu i se tulaga faaletonu i'a maua pe'a faaauauina pea le faaogaina o nei ituaiga o faigafaiva. O le a o'o ina faaitiitia i'a e mafai ona o'o atu lo latou lapopoa e Maua ai le avanoa e fanafanau ma tautuufua ai.

Fuafuaga faataatitia a le Afioga

Ua faailoa mai e le Komiti (KFVL) o le faaogaina o upega ma tili matanini'i, o se tasi lea o mafuaaga ua faaitiitia ai i'a maua i le gataifale. O lea ua aiaia ai loa se tulafono ina ia faasaina ai upega ma tili matanini'i ona toe faaogaina i fagotaga i le gataifale o le afioga. Ua faapea foi ona faaalua mai e le afioga lo latou matua lagolagoina o le tulafono a le malo ua iai nei mo le faatapulaaina o mataupega ma tili.

Tulafono:

"Ua matua faasaina lava ona toe faatinoina faigafaiva e faaogaina ai upega ma tili mataninii i gataifale o le Afioga o Vaiusu.

Faasalaga:

O soo se tagata o le afioga e solia lenei tulafono o le'a faasalaina i le \$100.00 ma le 5 pusa apa. Mo tagata mai isi afioga o lea faasalaina i le \$500.00, a le usitaia o le'a molia sao i le tulafono faatonutonu a le malo mo faigafaiva.

Fuafuaga faataatitia a le Ofisa o Faigafaiva:

O le lagolagosua mai a le Ofisa o Faigafaiva e ala i lana polokalame fesoasoani o le tuuina atu o faamatalaga e saga faamautuina ma faamaopoopoina ai lenei tulafono.

4.6 la faasaina faigafaiva mai isi Afioga.

Otootoga

O fagotaga mai isi nuu e faaogaina ai faigafaiva le talafeagai, e iai ava niu kini, fanaia, vailaau oona, ua mautinoa le matua faaleagaina ai o le gataifale.

Fuafuaga faataatitia a le Afioga

Ua faaalua mai e le komiti (KFVL) le tatau ona faia o se tulafono e faasa ai faigafaiva e pei o le faaogaina o faigafaiva le talafeagai. O le autu moni o lenei tulafono ona o nisi o tagata mai isi afio'aga o loo latou faatinoina faigafaiva i gataifale ma faatamaia ai. O lea ua faia ai se tulafono ma ona aiaiga mo le mamalu o le atunuu lautele aemaise i latou e i fafo atu o le itumalo o Vaiusu.

Tulafono:

"Ua matua faasaina lava tagata mai isi afioga ona toe fagotaina gataifale o Vaiusu se i vagana ua feutagai ma le komiti.

Faasalaga:

"O le a molia sao tagata faifaiva mai isi afioga i le tulafono o faigafaiva.

Fuafuaga faataatitia a le Ofisa o Faigafaiva:

O le'a fesoasoani mai le Ofisa mo le faamalosia ma le faamautuina o lenei tulafono.

4.5 la faasaina ona toe fagotaina mai i'a ma figota laiti.

Otootoga

O le fuafua tatau o le fagotaina mai o i'a ma figota o se itu lelei tele ma talafeagai lea mo le faasaina ma le toe faatupulaia o meaola o le gataifale. O lenei fuafuaaga o le a mafai ai ona maua le avanoa e i'a ma figota laiti e tutupu ma fananau ai i le uluai taimi ao lei fagotaina mai. Afai e pueina ma fagotaina mai se i'a poo se figota ae lei oo i le lapoa (matua) e fanafanau ai, o lona uiga ua leai sona sao i le isi augatupulaga e sosoo ai. Afai la o le a faaauuina pea lea tulaga, o le a saga faaitiitia pea le faitauaofai o i'a ma figota ma faasolo lava ina mou malie ese atu.

Fuafuaga faataatitia a le Afioga.

Ua faaalua e le Komiti (KFVL) lo latou lagolagoina o le Tulafono Faatonutonu o Faigafaiva ua pasiaina nei o loo aiaia ai fua faatapulaa o le laiti o i'a ma figota e tatau ona fagotaina. Na taua foi o le faamalosia o lenei Tulafono o le a iai pea lea i le pule mamalu a Alii ma Faipule faapea le Pulenuu ma le Komiti. Ua lagolagoina foi e le afioga le pepa o faamatalaga o loo faaalua ai fua faatapula'a o le laiti o i'a ma figota e fai ma taiala.

Tulafono:

"Ua matua faasaina ona toe fagotaina ia ma figota laiti mai le gataifale o Vaiusu, e pei ona faaalua i le Tulafono Faatonutonu o Faigafaiva a le Malo."

Faasalaga:

Mo tagata o le afioa'ga o le solia lenei tulafono, o le a faasalaina i le \$100.00 ma le 5 pusa apa. Mo tagata mai isi afioa'ga o le a molia sa'o i le tulafono o Faigafaiva a le Malo.

FuaFuaga Faaataatitia a le Ofisa o Faigafaiva

O le a fesoasoani atu pea le Ofisa i le faamautuina o lenei tulafono ma tufaina atu pepa o faamatalaga o nei tulafono ma faamalamalama atili mo le silafia e le mamalu o le atunuu.

4.6 la faasaina ona toe taina togatogo.

Otootoga

O togatogo o se tasi lenei o vaega ua tele sona sao i le gataifale mo le toe faatupuina o nisi o ia ma figota. O le taua o le faasaina o togatogo ona o nisi meaola ninii o le gataifale ua avea lea nofoaga ma vaega e sulufai i ai mai o latou fili, a'o nisi o i'a ma figota ua avea togatogo ma nofoaga e fanafanau ma tautuufua ai. A tanumia pe taina i lalo ma faaleagaina togatogo o lona uiga o le a faaitiitia i'a ma figota mo tupulaga o le lumanai.

Fuafuaga faataatitia a le Afioga.

Ua ioeina e le komiti (KFVL) le tatau ona faamalosia le faasaina ole togatogo ona le fia faasaina pea o i'a ma figota ma isi meaola o loo avea lea vaega ma nofoaga e fanafanau ai. O le faasaina o lenei togatogo o le a faamamaluina e le pule Mamalu a Alii ma Faipule o Vaiusu.

Tulafono

Ua matua faasaina lava ona toe taina i lalo ma faatamaia togatogo o lo'o ol i totonu o lenei afioga.

Faasalaga

So'o se tasi o le afioga po'o se isi afioga i fafo atu le le usitaia lenei tulafono o le a faasalaina loa i le \$50.00 ma le 2 pusaapa, a leai o le molia i le tulafono.

Fuafuaga faataatitia a le Ofisa o Faigafaiva.

O le a fesoasoani le Ofisa i le tuuina atu lea o ni pepa o faamatalaga e faatatau i le taua ma le aoga o le Togatogo e faamalamalama atili ai lenei mataupu.

4.7 la faasaina le laueseina o le oneone.

Otootoga

O le faateleina o apitagalu ma matafaga mai le fetafeaiga o au ma galu malolosi ua faapogai mai lea ina ua tele se vaega o oneone o le matafaga poo apitagalu ua asuina. Ua avea foi le asuina o le oneone ma mafuaaga ua faaitiitia ai ona toe ofaga le tele o meaola o loo aumau i nei vaega o le gataifale.

Fuafuaga faataatitia a le Afioga.

Na faaalua e le komiti (KFVL) o le laueseina mai o le oneone mai le sami o se tasi lea o mafuaaga o le faaitiitia o ia ma figota. O lea ua fausia ai se manatu ina ia taofia le faia o lea tulaga se i vagana se pemitā faatagaina mai i lenei afioga o Vaiusu e ala lea i se tusi aloaia e mafai ai ona faia lea tulaga i gataifale o lenei afioga.

Tulafono

"Ua matua faasaina lava soo se tagata ona toe eliina le oneone o lenei afioga se i vagana o se tusi aloaia mai le afioga e mafai ai ona faatinoina lea vaega".

Faasalaga

O i latou uma o le a le usitaia lenei faasalaga o le a molia loa i le tulafono a le Vaega o Faigafaiva.

Fuafuaga faataatitia a le Ofisa o Faigafaiva.

O le a fesoasoani le ofisa o Faigafaiva i le Afioga i le faamautuina lea o lenei tulafono faatasi ai ma le tufaina atu o ni pepa o faamatalaga e faamalamalama atili ai mo le silafia e le mamalu o le atunuu.

4.8 la fa'aogaina le Mana o Talosaga!

Otootoga

o talosaga ma talitonuga tuu faatasi faa-le-lotu, o se tasi lea o faamoemoega ua talitonuina le taua aua le puipuia ma le faasaogalemuina o le gataifale ma ona tamaoaiga aemaise o lona siosiomaga.

Fuafuaga Faataatitia a le Afioga.

O le sao taua o le au fai-lotu, o le unaiā lea ma faamalosiā i tagatanuu ina ia latou faatauina le puipuia ma le saogalemu o le gataifale na ona tamaoaiga.

O le tuufaatasia o finagalo o tagata ina ia galulue faatasi e foia ai foi faafitauli o loo aliaē mai i le gataifale. Ua lagolagoina foi e le komiti lenei fautuaga ma fautuaina ai le galulue faatasi o le afaigaluega ma le mamalu o le afioga

Fuafuaga Faataatitia a le Ofisa o Faigafaiva.

O le a mafai ona tuuina atu ni fesoasoani mai le Ofisa mo le mamalu o le au failotu e ala i pepa o Faamatalaga ma Tautalaga ina ia fesoasoani i le tapenaina o a latou lauga ma aoaoga mo le puipuia o le siosiomaga o le gataifale ma ona tamaoaiga.

4.9 Talosaga.

O nei talosaga sa mafai ona tuuina mai e sui o le afioga sa auai i fonotaga ma le Vaega o Faigafaiva i le taimi o faatalatalanoaga i vaega e tolu. O talosaga uma foi la ua tuuina mai sa faamautuina e le Komiti

(KFVL) i le latou fonotaga ma le Ofisa. Pe a talafeagai ai, o nei talosaga o le a mafai ona iloiloaina e le Ofisa mo le faataunuaina pe a maea le taliaina o lenei tusi taiala e le Pule Mamalu a Alii ma Faipule i le Fono Tele. O talosaga uma sa tuuina mai o lo o faailoa atu i lalo:

- Atinae Faasao (Togatogo)
- Atinae pa'alimago
- Atina'e faisua

4.10 Maliliega.

Ua i ai le maliliega o le a galulue so'oso'o tauau uma vaega i le puipuiga o le sioisomaga o le gataifale mo le manuia o tagatanuu o le afioaga aemaise o tupulaga o le lumanai. O lea manuia e mafai ona maua pe a faatinoina uma fuafuaga faataatitia ua tamauina i Fuafuaga Tatau mo le Puipua ma le Vaaia Lelei o ia ma figota o le Afioaga.

4.10 Toe iloiloaina o lenei Fuafuaga Tatau.

O lenei fuafuaga o se toe iloiloaina lea mo lona agai i luma atoa ai ma lona toe suesueina ina ia faailoa ai le taua ma le aoga o lenei o polokalame i totonu o nuu ma afioaga. Atoa ai ma se auiliiliga maumaututu i le tulai mai o galuega fai a le afioaga ma le Vaega o Faigafaiva i le faataunuaina o Fuafuaga Faataatitia e pei ona taua i luga.

O lenei foi iloiloga e lipotia ai le alualu lelei ma le faaletonu i totonu o le Polokalame talu ona faavaeina i totonu o le afioaga. E le gata i lea o ni vaega e toe fia fai i ai ni suiga fou e pei o le toe teuteuina o tulafono ma le faamautuina o matafaioi a itu uma o le polokalame.

Fuafuaga Faataatitia a le Ofisa o Faigafaiva.

Ua i ai le maliliega a le Komiti (KFVL) a le afioaga ma le Vaega o Faigafaiva o le a toe auiliiliina lenei Fuafuaga tatau pe a maea le ono (6) masina talu ona pasia lenei tusi i le Fono Tele. O le a toe feutagai le Ofisa ma le Komiti i se aso o le a atofaina pe a atoa le 6 masina.

4.11 Upu Mulimuli.

O le auai o le afioaga o Vaiusu i le Polokalame mo le Pulea ma Vaaia Lelei o la ma Figota ua mautinoa le manuia o le afioaga mo ni tausaga o i luma. O le manuia ma le alualu i luma o lenei polokalame e faalagolago lea i le galulue faatasi o le Afioaga; i le Pule Mamalu a Alii ma Faipule, Komiti a Tina, Aumaga aemaise o le Malo e tau ala mai lea i le Vaega o Faigafaiva i le faatinoina o fuafuaga faataatitia ua maea soalaupule i le tele o fonotaga ma faatalatalanoaga.

O lenei polokalame o se galuega e umi se taimi e faatatali ai ni tali faaaliali ma sona lelei, o lea e taua ai mo le silafia e tagatanuu o le afio'aga. O i latou o le a talisapaia ma 'ae'ae i nei manuia o tupulaga o le lumanai o le afio'aga. O lea ua a'e ai se tofa i le Afio'aga e faia se polokalame fa'apenei a le Malo e fesoasoani ai e toe tapu'e mai le sosia o le tamaoaga o le gataifale o le afio'aga ua tauau ina mou atu.

4.12 Ogasami Faasaoina.

Otootoga

O se vaega ua faasaoina o le gataifale e le tatau ona toe aafia i ni faivafaiva. O le avea o se vaega o le gataifale ma vaega faasao o le a faapea ona malu puipua ai le siosiomaga o le gataifale ma faatamaoaga ai i i'a ma figota. O lenei vaega faasao o le a faasaoina ai amu, aau, figota faapea foi ma i'a ina mafai ona maua e nei meaola le avanoa e tautuufua ai ma fanafanau ai. O le autu taua, lava o le a avea lenei faasao ma punaaga o i'a ma figota e mafai ai ona toe faaleleia nisi vaega o le gataifale ua afaina. O le fanafanau ma tautuufua i'a ma figota o lo'o aumai i le vaega faasaoina ma tafea atu o latou fua fanau ma faatupuina ai, nisi meaola fou i nofoaga ua le maua ai ni i'a ma figota. O le a le pine o manuia ai i tatou ae faapea foi tupulaga o le lumanai.

Fuafuaga faatatitia ale Afiio'aga

O le afioaga o le a latou filifilia se vaega o le gataifale e faationina ai le vaega faasaina. O le a latou fausiaina foi ni tulafono e faamalosia ai le faasaina o ni faigafaiva e faatinoina i totonu o lea Vaega. O le Afiioaga foi latou te mataituina ma faamalosia tulafono a le Afiioaga.

Tulafono